

Qanoq ililluta ilaqutariinnut suliniarnitta pitsaanerulersinneratigut pisullu tamaasa isiginerisigit meeqqat angerlarsimaffiup avataanut inissinneqarsimasut amerlassusaasa ikilisarsinnaanerata pillugu apeqquteqaat aallaavigalugu oqallinnissamik siunnersuut. (Inatsisartunut ilaasortaq, Bo Martinsen, Demokraatit)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Siullermeerinninneq

Inatsisartunut ilaasortaq Demokraatineersup, Bo Martinsenip, sammisamik pingaarutilimmik oqaluuserisassanngortitsineranut qujavunga.

Erseqqissarlugu aallarniutigerusuppara angajoqqaanut angerlarsimaffiup avataanut inissinneqarsimasunik qitornalinnut workshoppertitsinissaq pilersaarutigigakku, aaqqiissutissarsinissaq siunertaralugu. Iliuuserineqartartut amerlagaluartut inissiisarnit suli amerlasuupilussuupput, taamatullu suliniuteqarnikkut angajoqqaat isummersuutaasa akuutinneqarnissaat Naalakkersuisunit kissaatigaarput, ilisimasamik nutaanik pissarsinissaq suliniuteqarnermilu nutamik eqqarsarnissaq siunertaralugu

Angajoqqaat pimoorussamik peqataatinnerisigut politikkikkut aalajangiinissamut pitsaanerusumik toqqammavissaqalissaagut suliniutigisartakkatsinnillu sammivilersuinnaanerussalluta. Angajoqqaanik peqataatitsinikkut pissutsit inissiisoqartarneranik kinguneqartartut paasilluarnissaannik nukittorsaassaagut, peqatigisaanillu angajoqqaat unammilligassanik nalaattagaat paasisimasaqarfīgilerlugit. Suliniut angajoqqaanut qanoq iliornissamut nukissaqarnerulersitsiinnarani meeqqat atugarissaarnissaannut iluaqutaassaaq angerlartitsinissamullu periarfissanik annertunerulersitsissalluni.

Tamatuma saniatigut suliassaqarfimmi periusissianik iliuusissatullu pilersaarutini aallartereersunik amerlasuunik ingerlataqarpugut. Ullumikkulli taakkua pillugit oqaluuserinninnissannut piffissaq atornianngilara. Oqallinnissamik siunnersuuteqartup apeqquteqarnissannut periarfissippaanga ukiorpassuarni suliniutit aallussimasagut naatsorsuutigisatsit ilumut sunniuteqarsimanersut. Imaluunniit nutamik eqqarsartariaqalersimanersugut.

Ombudsmandip isumaginninnermut suliassaqarfiup annertunerusumik ukkatarineqarnissaanik kissaatigalugu oqaaseqarfīgisimavaa. Meeqqat Oqaaseqartartuat tamanna ersarissumik oqaluuserinikuuaa, ilisimatuut ersarissumik uppenarsarnikuaat, innuttaasullu namminneq misigisimavaat. Ilumut suut aamma allat pisariaqartippagut? Artorsaatigut naammannginnamik?

Apererusuummerpassi:

Kommunit akornanni isumaginninnermut suliassaqarfiup aaqqissugaanerata qiviarneqarnissaa piffissanngorpaa?

Nalunngisassitut Naalakkersuisut toqqagaaninniilli suliassaqarfik
ilisimasaqarfiginerulerniarlugu kommunit angalaarfigisarikka aammalu innuttaasunik
sulianillu suliaqartartunik oqaloqateqartartunga. Ajornartorsiut uteqqiattumik
eqqaaneqartuartoq tassaavoq politikkikkut takorluukkat innuttaasullu akornanni ungasissuseq.
Aamma nalunngilarput suliassanik suliarinnittarnerup sivilissusaa pissutaalluni innuttaasut
inatsisitigut isumannaatsuunerat ulorianartorsiortinneqartoq. Maannakkut pisariaqarpoq
apeqqutigissallugu: Qanoruna isilluta suliassaqarfik kivitseqataaffiginiaripput,
aaqqissugaanerup isiginnittaasianniit pinnani, innuttaasulli atugaanniit aallaaveqartumit?
Allatut iliornissatsinnut piffissanngunngila? Iliuuseqarnissatsinnut piffissanngunngila?

Naalakkersuisut ilaqutariit pitsanngorsaaviginiarlugit suliaqartuupput, sequtserisuunatik.
Piviusorli imaappoq, meeqqat amerlavallaat suli inissinneqartarput, ilaqutariit
sequminneqarlutik: Qanoruna meeqqat angerlarfigisinnaasaattut ilaqutariit toqqissisimasumik
tunngaveqalernissaannut ikiorniarigut? Piffissanngunngila inuit aningaasaliiffigissallugit?

Taama oqaaseqarlunga sammisap pingaarutillip oqallisigineqarnissaa Naalakkersuisunit
qilanaarivarput.